

大比丘語復至再三爾時彼比丘身口意熾盛復至彼村落乞食遙見女人端正無比色猶桃華見已便起婬心以此婬心身口意熾然彼以身口意熾然故即於彼村落乞食已還所止處往尊大比丘所以此因緣具向諸比丘說彼尊比丘告此比丘言汝往非我衆中比丘爾時此比丘不捨禁戒便著俗服樂愛欲中是謂比丘魔得其便隨波旬所欲亦不脫生老病死愁憂苦惱如是諸比丘利養具甚爲難甚爲苦甚爲恐懼墮入惡趣不生

無上處是故諸比丘當作是學已得利養當捨離之未得利養不起貪意如是諸比丘當作是學爾時諸比丘聞佛所說歡喜奉行

佛說大魚事經

佛說阿難七夢經

東晉西域沙門竺曇無蘭譯

阿難在舍衛國有七種夢來問於佛一者夢陂池火燄滔天二者夢日月沒星宿亦沒三者夢出家比丘轉在於不淨坑塹之中在家

白衣登頭而出四者夢群猪來舐突栴檀林
五者夢頭戴須彌山不以為重六者夢大象
棄小象七者夢師子王名華薩頭上有七毫
毛在地而死一切禽獸見故怖畏後見身中
蟲出然後食之以此惡夢來問於佛佛時在
舍衛國普會講堂上與波斯匿王說法苦集
滅得道為樂見阿難憂色愁苦巨言佛告阿
難汝於夢者皆為當來五濁惡世不損汝也
何為憂色第一夢陂池火燄滔天者當來比
丘善心轉少惡逆熾盛共相殺害不可稱計

第二夢日月沒星宿亦沒佛泥洹後一切聲
聞隨佛泥洹不在世衆生眼滅第三夢出家
比丘轉在於不淨坑塹之中在家白衣登頭
出者當來比丘懷毒嫉妬至相殺害道士斬
頭白衣視之諫訶不從死入地獄白衣精進
死生天上第四夢者群猪來舐突栴檀林者
當來白衣來入塔寺誹謗衆僧求其長短破
塔害僧第五夢者頭戴須彌山不以為重者
佛泥洹後阿難當為千阿羅漢出經之師一
句不忘受悟亦多不以為重第六夢者大象

棄小象將來邪見熾盛壞我佛法有德之人
皆隱不現第七夢師子死者佛泥洹後一千
四百七十歲中諸弟子修德之心一切惡魔
不得擾亂七毫者七百歲後事

佛說阿難七夢經

卷八

十七

佛說呵鵬阿那舍經

東晉西域沙門竺曇無蘭譯

聞如是一時佛在舍衛國祇陀園呵鵬阿那
舍將五百優婆塞至舍利弗所作禮已却坐
舍利弗爲說經大歡喜而退復至佛所以頭

面著地叉手繞佛三匝却坐佛問呵鵬阿那
舍若有何功德教化五百弟子隨侍汝呵鵬
阿那舍即長跪叉手言我常奉行佛所說四
事何等爲四一者布施於人二者說善語三
者占視同學給足有無四者同學者財共不
計佛言善哉善哉已過去佛無有過是四事
未來佛亦無有過是四事今現在佛亦無有
過是四事佛爲呵鵬阿那舍說經已各大歡
喜而退呵鵬阿那舍還歸入舍呼諸人客奴
婢坐著前好爲說經開解語生死善惡之道